

無字妙經


上

特258

69

222

18



始




特 258
69



無
字
妙
經

日
似
秋
去
鮮
常
轉
風
水
鼠
帝
飲
豐
昌



皇風永扇 帝道遐昌

佛日增輝 法輪常轉

無字妙經品目

卷之上

序品第一

法身無相品第二

機關實相品第三

言詮微妙品第四

難透正眼品第五

向上涅槃品第六

卷之下

五位法藏品第七

十重妙心品第八
護持附囑品第九
流通法門品第十

品目終

無字妙經卷之上

正法山妙心禪寺住持沙門 寶嶽 撰

序品第一

無字經童子曰吾有一枚金文容十法界不爲廣收
歸隣虛不爲陝山河大地日月星辰萬象森羅濕胎
卵化有情非情束以爲一片無字經不待結集不假
翻譯乃以一氣爲筆以造化爲紙以陰陽爲金軸以
大虛爲縹帙而佛々要機祖々機要悉皆無不備焉
或謂之無生曲或謂之無爲國或謂之無底鉢或謂
之無底船或謂之無絃琴或謂之無星秤或謂之無

鬚鎖，或謂之無縫塔，或謂之無孔笛，或謂之無影樹，畢竟無相無形無痕，可尋不去，不住無跡，可覓。諸人且道：一大藏經，百家異道，還曾有這箇消息麼？世尊隻眼通三世，覩破不能；外道雙眸貫五天，終窺不得。言語道斷，心行處滅，以是般若多羅強名爲如是經。首山念又指作此經，及落乎童子手中，全絕一切名言文字，已無人法譬喻，何有序正流通？若至論佛魔紛紛底事，則大錯了也。華嚴如來出現品曰：佛子，譬如有大經卷，量等三千大千世界，書寫三千大千世界事中，一切皆盡，所謂書寫大鐵圍山中事，量等大

鐵圍山，書寫大地中事，量等大地，書寫中千世界中事，量等中千世界，書寫小千世界中事，量等小千世界。如是若四天下若大海，若須彌山，若地天宮殿，若欲界空居天宮殿，若色界宮殿，若無色界宮殿，一一書寫其量悉等。此大經卷雖復量等大千世界，而全住在一微塵中，如一微塵，一切微塵皆亦如是。時有一人智慧明達，具足成就清淨天眼，見此經卷在微塵內，於諸衆生無少利益，卽作是念：我當以精進力破彼微塵，出此經卷，令得饒益。一切衆生作是念，已卽起方便，破彼微塵，出此經卷，令諸衆生普得饒益。

如一微塵一切微塵應知悉然佛子如來智慧亦復如是無量無礙普能利益一切衆生具足在於衆生身中但諸凡愚妄想執着不知不覺不得利益爰有一老翁不知何許人一日謂童子曰吾審如是事汝手裡却覺有箇離文字印麼童子纔開手無字妙經百千萬億卷放光而出熟看之一微塵中卷有兩軸上曰乾下曰坤經中所說略具十品初之示法身見性之端的使他有箇入頭處次說機關差別之法門使他知悟后修行樣子次述言詮微妙之境界使他得宗通說通自在三昧中之提起難透難解之話頭

直使他無轉輻之處又拈出向上宗乘些子使他知吾宗別有生涯又鑿開五位正徧之道使他具成大法王之質更說十重波羅提木又使他入無相心地法門後之明護持付囑之旨使他知正念工夫不斷相續之要又示流通正法之因緣使他普化人天廣施利益是名爲十品如是宣說開示無量無邊妙義無數億偈自初至終未曾說一字丙丁童僻地裏垂泪自頂至底未曾施一丁壬癸神無人處咬牙如一微塵一切微塵亦復如有心不可得無心不可求語言不可造寂默不可通到者裏作麼生趣向作麼

生證入作麼生用心作麼生捕覷黃面老漢以此經傳之破顏尊者碧眼胡僧以此經傳之斷臂師祖所謂正法眼藏涅槃妙心實相無相微妙法門亦是不立文字教外別傳直指人心見性成佛也如是微妙不思議大經典三世諸佛從劫至劫手不釋卷歷代祖師從晝至夜無不念時瞿曇依此經曾受燃燈記慈氏依此經當來出世但是人々日用不知箇々眼裏無筋鵲噪鴉鳴讀誦未了松風蘿月詮註慇懃忽見黃檗翻轉此經打出濟北小廁兒睦州裂破此經擲着韶陽鍍鑠鑽僞仰背誦此經父子唱和曹洞受

持此經君臣合道以至五家提唱七宗舉揚皆把得此經金聲玉振邁古超今乃至久遠劫來河沙國土蠢動含靈艸木叢林天龍八部人天外道異類雜形阿修羅大力鬼地獄衆生等悉依此經蕩々焉廓々爾絕色離空投明合暗淨裸々赤灑々欲覓箇元字脚亦不可得於戲大哉此經至哉此經不可謂滿龍宮不可謂溢海藏金人何曾入夢白馬胡爲其來玄獎法蘭口啞舌禿未有世界早有此經世界壞時此經不壞諸佛未出世祖師未西來人々常光現前箇々壁立萬仞在聖不增一絲毫在凡不減一絲毫惟

是迷悟有殊所以聖凡有異致執泥文字之學滋多
本有之性不能發現背覺合塵棄本逐末輪迴諸趣
皆由是矣或問既是無字經因甚却有許多言詮曰
汝作恁麼見解有何了期不見世尊言有取衆生所
言說一切有爲虛妄事雖復不依言語道亦復不著
無言說若一向著無言說墮在黑山下生涯鬼窟裡
活計所以天地造化有陰有陽有寒有暑明王治世
有禮有樂有刑有政佛法住世有頓有漸有實有權
有邪有正衲僧門下有抑有揚有褒有貶有縱有奪
有殺有活教中道治生產業皆與實相不相違背又

道法住法位世間相常住佛法世法都盧一片正是
箇道理我若廣說從旦至暮鈎鎖連環相續不斷假
使大地盡末爲塵一一塵有一口說到盡未來際亦
不能得盡爲甚麼如此這箇是無盡藏信解門無盡
藏行願門無盡藏慧炬門無盡藏究竟門法門既無
盡所說亦無盡衆生界無盡所說亦無盡此是諸佛
諸祖智慧神通變化無盡法門把世間有爲功用思
忖他不得譬如帝網交光重重主伴無盡又喻如鏡
燈分照歷々內外分明一佛攝萬億之佛佛佛圓融
一法傳百千之法法法無礙普令一切衆生發無上

正等菩提之心生。希有想者。夫此妙經乎。若人以此經治國。則國無不治。理民則民無不安。崇福則福無不資。祈壽則壽無不永。豈特此爲然。無邊有情成就。佛道無所施而不可。無所行而不宜。若夫天失此經。則日月星辰不明。風雨霜雪不時。五行錯繆。万物不生。地失此經。則山嶽丘陵于崩。河水溪流于溢。地脉騫裂。百寶不成。人失此經。則性情相亂。邪惡競起。入地獄如箭射。諸人却要看無字經。麼不得作有無會。不得作是非會。不得作自他會。不得作生佛會。不得作心性會。不得作理事會。不得作奇特會。不得作玄

妙會。不得向意解情知處。卜度不得向揚眉瞬目處。梁根不得颺在無事甲裡。不得墮在葛藤窠裡。不可向人問無字經。無字經之中無言說。故不可起念看。無字經。無字經之中無思量。故但十二時中。四威儀間。單々提撕切々舉覺。以悟爲則。作麼生是箇無字經。不離日用。如是厓去厓來。看忽然龜紋爆發。必知自家本命元辰。落着處。方堪報不報之恩。以助無爲之化。若或未然。枉來南閻浮提。打一遭古德云。須將生死二字。貼在額頭上。討取箇分曉。打破生死心。悟了本性。與三世諸佛。眉毛厮結。與歷代諸祖。鼻孔厮

無字如經
柱當是時咳唾掉臂未曾不與斯道昭然混合豈不
慶快哉若疑是言一事亦不成莫言不道世尊有言
得觀佛經難如今諸方無看經眼妄看經無禮佛心
妄禮佛大錯了矣切勸真正道流只箇無字經不打
失亦不污染外讀誦之內持念之日々懇禱時々思
惟不思議薰不思議習如霧濕衣如香着物自然得
成佛祖大事自利利他皆悉圓滿而已

頌曰

無字經兮有字經 惟凡惟聖立門庭
請看石古苔蒸處 一道澗泉遊鵲鴿

法身無相品第一

無字經童子曰道人最初見性所見境界之謂法身
這箇以法爲身以惠爲命乃出於真空無相之中入
於無礙解脫之境直是活潑々地轉轉々地也汝若
要見法身先須見性夫見性者猶如懸崖撒手而絕
後再蘇息來然是謂大死一番底時節又謂大活現
前底境界所以古人曰欲知佛性義理當觀時節因
緣時節既至如迷忽悟因緣自會如忘忽憶方省己
物不從他得其或未然依然業識茫茫底衆生永劫
不免輪廻且據經論家佛具三種身一法身又名自

性身一切諸佛悉皆同體有大斷德二報身又名受
用身一切諸佛悉皆同相有大智德三應身又名變
化身一切諸佛悉皆同用有大恩德此三身本是一
體從用立名故有多種譬之法身如月體一輪在天
影含衆水報身如月光照臨萬像無有隱形應身如
月影有水則現無水則不現所以教中道如來眞法
身猶如虛空應物現形如水中月無有障礙是果什
麼物也太奇怪臨濟大師曰爾一念心上清淨光是
爾屋裡法身佛爾一念心上無分別光是爾屋裡報
身佛爾一念心上無差別光是爾屋裡化身佛此三

種身是爾即目前聽法底人祖師眞說不可壞恰
如大火聚近傍則燎却面門又如太阿劍擬議則喪
身失命如今人不曾古人意只管咬言嚼句孟八郎
道離色身無法身離法身無色身色身即法身法身
即色身且得沒交涉似恁麼見解有甚了期僧問夾
山如何是法身山云法身無相僧問雲門如何是透
法身句門云北斗裏藏身僧問大龍色身敗壞如何
是堅固法身龍云山花開似錦澗水湛如藍僧問雲
門如是是清淨法身門云花藥欄杜順和尚法身偈
云懷州牛喫禾益州馬腹脹傅大士法身偈云空手

把鋤頭步行騎水牛。永明壽禪師普請次聞墮薪有聲豁然契悟乃云撲落非他物縱橫不是塵山河並大地全露法王身。虛堂拈云壽禪師大似窮儒登群玉府無不稱心滿意只是中間有一字子未穩僧問雲門如何是法身向上事門云向上與汝道即不難作麼生會法身僧云請和尚鑑門云鑑即且置作麼生會法身僧云恁麼恁麼門云這箇是長連牀上學得底我且似汝法身還喫飯麼僧無語雪竇拈云將成九仞之山不進一簣之土過在什麼處僧問仰山法身還解說法也無仰云我說不得別有一人說得

僧云說得底人在甚處仰山推出枕头馮山聞乃云寂子用劍及上事南泉願禪師因施主施棍師提起示衆云法身具四大有人道得與汝一腰棍道吾出云性地非空空非性地此是地大三大亦然師云與汝一腰棍諸上座於此等因緣如十字街頭見親骨肉驀地撞着更無疑惑相似許汝識得法身若認箇驢前馬後底有何用處古人道聰明者多見性者少見性一事誠是禪門千古之眼目也者裏不取汝懸河之辯不用汝驚子之智畢竟作麼生即是只須返照自己始得豈不見老瞿曇初生下一手指天一手

指地周行七步目顧四方云天上天下唯我獨尊。尊早是露箇消息。後來雲門拈云我當時若見一棒打殺與狗子令喫却貴圖天下太平好作家不妨奇特。長沙道盡十方世界是沙門。隻眼盡十方世界是沙門。全身盡十方世界無一人不是自己。這箇當體是謂毘廬遮那法身佛。便見曦躑星辰常點自己之光明。迅雷霹靂忽轉自己之機輪。風雨霜露即示自己之涵養。紅花綠葉直徵自己之發達。秋月冬雪全表自己之精神。春蟲夏蟬亦皆因自己。以消息焉反之味沒自己。則天地黑闇陰陽失調。足爲何山河大

地。足爲何艸木國土。所以瞿曇臘月初八菩提樹下金剛座上一見明星。忽然大悟曰奇哉。一切衆生悉具有如來智慧德相。但以妄想執着。故不證得。又曰一佛成道觀見法界艸木國土悉皆成佛。若人識得自己智慧德相。便識得三世諸佛智慧德相。非但識得三世諸佛智慧德相。亦乃識得西天二十八祖智慧德相。非但識得東土六祖智慧德相。亦乃識得東土六祖智慧德相。非但識得天下老和尚智慧德相。亦乃識得過現未來刹々塵々諸

善知識，智慧德相，正當恁麼時，自己與三世諸佛，古往今來一切智識，同一眼見，同一耳聽，同一鼻嗅，同一舌嘗，同一身觸，同一意思，更無纖毫差別異見。雖然與麼臨河渴底，人無數，飯籬邊餓底，如恒沙，涅槃經曰：諸佛世尊眼見佛性，如觀掌上阿摩勒果。又法華經曰：父母所生眼，悉見三千界，有是哉，有是哉，吾有箇話頭舉似汝諸人。僧問趙州狗子，還有佛性也。無州曰：無。只這無字，恰似一箇鐵餛飩，相似切要，汝橫咬堅，咬去咬來，念々心無間斷。若能一咬々破，百味頓具足，可以增長法身，謂之禪悅食，或謂之烈。

燄聚，或謂之金剛王寶劍，或謂之踞地獅子，或謂之頂王三昧，或謂之一超直入如來地，或謂之塗毒鼓，或謂之種々名。佛光國師在無準禪師處，提撕箇話，一夜四更聞首座寮，版聲忽爾有省，投機偈曰：一槌擊碎精靈窟，突出那叱鐵面皮。雙耳如聾，口似啞，等閑觸着火星飛。這箇公案，與白隱隻手之話，共稱叢林二大甘露門。童子隻手頌曰：獨掌由來不浪鳴，纔容擬議野狐精。寄言瞻撥參玄士，莫墮賴耶暗黑坑。學者或於庭前柏，須彌山等之話，得箇入頭處，亦可古德云：從緣入者，永不退失。是故有見桃花悟去有。

擊竹作聲，有捲簾悟去，有過水觀影，有聞鼓角聲，有聞鐘鼓聲，有聞蛙鳴，有聞鶯語，有金鴨香消，有磨盤空裏走，有心空及第去。古人入理，因緣各不同，祇要汝入識田中，快下一刀，不然見性猶隔羅縠。在南堂靜禪師曰：見性須如見掌上，了々分明，一一田地穩密，但諸入要，一回通身濺白汗去，果能得箇省力處，忽於一念子間，自性他性衆生性煩惱性菩提性佛性神性菩薩性有爲性無爲性畢竟性有情性非情性餓鬼性修羅性畜生性地獄天堂穢土淨土一見見徹不留毫芒，截斷無量劫來生死業根，了豈不痛。

快乎經曰：聲聞人見性如夜見月，菩薩人見性如晝見日，雖同是佛性，工夫着力之處，大有淺有深，又有麤有細，學者莫作容易看。假使汝透過話頭，生死網不裂，涅槃鎖不斷，徒增長無明耳。昔者達磨在嵩少，而面壁時有僧神光者，曠達之士也。久居伊洛，博覽群書，不事家產，好遊山水。每歎曰：孔老之教，禮術風規，莊易之書，未盡妙理。近聞達磨大師住少林，至人不遙當造玄境。曇華易見，知識難逢，乃往彼師常座，面牆莫聞誨勵，光自惟曰：昔人求道，敲骨取髓，刺血濟饑，布髮掩泥，投崖飼虎，古尙若此，我又何人哉。

其年十二月九日夜天大雨雪寒氣透骨光堅立不動遲明積雪過膝真箇勇猛精進勝丈夫所爲師憫而問曰汝久立雪中當求何事光悲淚曰惟願和尚慈悲開甘露門廣度群品師曰諸佛無上妙道曠劫精勤難行能行難忍能忍豈可以小德小智輕心慢心欲冀真乘徒勞動苦一著太煞慈悲光聞師誨勵潛取利刀自斷左臂置于師前一片心香盡未來際師知是法器乃曰諸佛最初求道爲法忘形汝今斷臂吾前求亦可在師遂因與易名曰慧可光云諸佛法印可得聞乎師云諸佛法印匪從人得光云弟子

心未安乞師安心師云將心來與汝安光云覓心了不可得師云與汝安心竟光於此悟入大覺禪師曰誠所謂忘形骸於寂寞之濱拚性命於險危之際今時學者豐衣足食密室溫爐六出纔飛袖手縮頸到此寧不愧於古人乎毛侍者評曰此因緣示古人爲法不避喪身失命又臨濟慧照禪師幼而穎異長以孝聞及落髮受具便慕禪宗初在黃檗會下行業純一因地不真果招迂曲首座歎曰雖是後生與衆有異遂問上座在此多少時師云三年首座云曾參問也無師云不曾參問不知問箇甚麼首座云汝何不

去問堂頭和尚如何是佛法的々大意驅羊入屠門
師便去問赤體挨白刃問聲未絕黃檗便打果然師
下來首座云問話作麼生師云某甲問聲未絕和尚
便打某甲不會不會最親首座云但更去問且要鈍
鐵再入紅爐師又去問不入虎穴爭得虎兒黃檗又
打如是三度發問三度被打禹門三級峻師來白首
座云幸蒙慈悲令某甲問訊和尚三度發問三度被
打自恨障緣不領深旨今且辭去捨父逃逝首座云
汝若去時須辭和尚去師禮拜而退首座先到和尚
處云問話底後生甚是如法爲道忘身爲法捨我若

來辭時方便接他向後穿鑿成一株大樹與天下人
作蔭涼去在識人還他蒲鞋眼正師去辭黃檗曰不
得往別處去汝向高安灘頭大愚處去必爲汝說韓
信背水師到大愚大愚問什麼處來師云黃檗處來
大愚云黃檗有何言句師云某甲三度問佛法的々
大意三度被打家醜外揚不知某甲有過無過自屎
不覺臭大愚云黃檗與麼老婆爲汝得徹困更來這
裏問有過無過鳳林吒之師於言下大悟云元來黃
檗佛法無多子因地倒者因地起大愚搗住云這尿
床鬼子適來道有過無過今却道黃檗佛法無多子

爾見箇什麼道理。速道。速道。殺人須看血。師於大愚脅下築三拳。虎子未絕乳。已有食牛氣。大愚拓開云。汝師黃檗。非干我事。古人相讓。如是師辭大愚。却回黃檗。黃檗見來。便問。這漢來々去々。有什麼了期。三日不相見。莫作舊時看。師云。祇爲老婆心切。欸出囚人口。便人事了。侍立黃檗。問什麼處去來。師云。昨奉慈旨。令參大愚去來。黃檗云。大愚有何言句。師遂舉前話。黃檗云。作麼生得這漢來待痛。與一頓隔靴抓痒。師云。說什麼待來。即今便喫。隨後便掌。冤有頭債有主。黃檗云。這風顛漢。却來這裏捋虎鬚。師便喝。閃。

電未收轟霹靂。黃檗云。侍者引這風顛漢。參堂去。把斷要津。莫輕放過。後馮山舉此話。問仰山。臨濟當時得大愚力得。黃檗力仰山云。非但騎虎頭。亦解把虎尾。是精識精。是賊知賊。真淨一日謂老黃龍曰。白雲端頌臨濟三頓棒。與某甲見處一般。南云。爾如何會他底淨。便舉頌。一拳々倒黃鶴樓。一踢々翻鸚鵡洲。有意氣時添意氣。不風流處也風流。南喝云。白雲會爾。不會。漆道人評曰。黃檗只管施以本分草料。恰如冤讎。然是爲學者不逢惡辣之手段。畢竟不能打破自己曠。却無明暗窟。徹宗旨之根源而已。若不恁麼。

地則五逆兒孫豈有今日哉勉乎哉諸禪德常以如
上大因緣掛在胸間刹那勿放失更須憶念慈明之
引錐蒙山之患痢雲門之折脚德山之疏鈔壁峯之
脇不席長慶之七座破等古因緣日夕修煉時夕體
究分陰莫空過古人曰爲勇猛衆生成佛在一念爲
懈怠衆生涅槃涉三祇又曰刻苦光明必盛大

頌曰

法身透得上頭關

直截根元者裏還

若是觸途成滯漢

銀山鐵壁絕追攀

機關實相品第三

無字經童子曰佛祖多少差別關鎖之謂機關所謂
別解脫之境界也夫見性之端的是謂理致學者若
滯見性一理更不進步不能證佛祖差別妙處爲救
此患舉起許多差別因緣聲訛公案衝之破之碧岩
集曰玉將火試金將石試劍將毛試水將杖試至於
衲僧門下一言一句一機一境一出一入一挨一撈
要見淺深要見向背若是皮下有血底漢掉臂便行
呼喚也不回凡宗師家爲人恰如巧工匠然抽釘拔
橛解縛去粘使汝到箇洒洒落落田地白雲和尚曰

此事直須悟始得悟後更須逢人始得學者若所得心不忘謂之法塵更過於世間塵勞十倍能障道眼不明是故黃龍死心曰有箇迷須得箇悟既得悟了須識悟中迷迷中悟至者裏衲僧門下不妨始共商量但鈍根樂小法大器期晚成或底言一旦見性則足更用許多機關爲什麼古人呵之謂見泥裏蚯蚓正受老人云茲有一箇重關關吏列坐各試其所能而後令其透過有稱輪扁者斲輪推出即去有稱畫工者拂戲畫一紙推出即去妓兒高歌一聲去淨家高聲念佛去特稱禪徒者被問作麼生是諸佛頂上

禪目瞠口喏茫然柴立只見兩腋汗於是爲胡亂賊奴終爲關外窮鬼寔可悲矣莫有要透關底麼個事祇是與箇漢話不見乎經中以文殊表見性大智以普賢表悟后修行棗柏大士有言雖有文殊見性大智若無普賢悟后妙行畢竟墮二乘見矧又理是頓悟事則在漸修縱使汝眼空宇宙氣吞佛祖不參見惡辣之宗師底皆是依草附木精靈野狐精魅見處偏固故於佛祖差別境界不得自由若汝一一透得機關分明從上佛祖所說理致亦是諦當所謂差別益明根本益明不然雖理致亦是關外消息實非佛

祖家裏消息。古人展啐啄之機，用軟頑之法，也只爲露箇消息。圓悟禪師曰：有祖以來，唯務單傳，直指不喜滯水，挖泥打路，布列窠窟，鈍置人蓋。釋迦老師三百餘會對機設教，立世垂範，大段周遮，是故最後省要接最上機，雖自迦棄二十八世，少示機關，多顯理致。至於付授之際，靡不直面提持，如倒刹竿，盞水投針，示圓相，執赤旛，把明鑑，說如鐵橛子，傳法偈，達磨六宗與外道立義，天下太平，翻轉我天爾狗，皆神機迅速，非擬議思惟所測。泊到梁遊魏，尤復顯言教外別行，單傳心印。六代傳衣所指，顯著逮曹溪大鑑，詳

示說通宗通，歷涉既久，具正眼大解脫宗匠，變格通塗，俾久滯名相，不墮理性言說，放出活卓々地，脫洒自由妙機，遂見行棒行喝，以言遣言，以機奪機，以毒攻毒，以用破用，信知禪門中別無奇特玄妙，唯有這腳踏實地底。一著子只是中古以來人物邪曲而滯，已見着小果故事不獲已，權立關門決斷所得，是謂公案。原夫公案取喻於公府之案牘也。法之所在而王道之治亂實係焉。公者乃聖賢一其轍，天下同其途之至理也。案者乃記聖賢爲理之正文也。叢林之爲能化者，乃如公府之長吏，欲取公案以爲法而斷。

學人之不正者也。決非一人臆見，乃會靈源契妙旨，越情量，破生死，如庭前柏樹子，麻三斤，乾屎橛之類，略無義路，與人穿鑿，即之如銀山鐵壁之不可透，唯明眼者能逆奪於語言文字之表，一唱一和，如空中鳥跡水底月痕，雖千途萬轍，放肆縱橫，皆不可得而擬議焉。遠自鷲嶺拈華，迨于今，又豈止乎一千七百則而已哉？無他，必待悟心之士，取以爲證據，耳非圖人益記持而資談柄，實擊碎學者未得謂得，未證謂證之金鎚也。燭破情識，昏衢愚迷，暗途之慧炬也。剔決見聞翳膜，知覺埃塵之金篋也。切斷生死根莖，涅

槃窟宅之利斧也。唯識法者懼苟，非其人詎可窺其彷彿也。莫道看話禪恰如梯子，可階而升，默照禪猶似鍋兒，可蓋而取。此事不是無心便休，亦不是有心便休，直須始終丈夫不受一法籠罩，方堪爲荷負大法之真實種艸。古德云：動中工夫勝於靜中工夫，百萬倍矣。如何謂動中工夫？豈不見正受老人示衆云：欲學不斷座禪，則入矛戟攻戰之巷，號哭悲泣之室，相摸掉戲之場，管絃歌舞之席，不加安排，不添計較，束作一則話頭，一氣進而不退，譬雖被阿修羅大力鬼捉肘臂，走遶三千大千世界，千回百匝，正念工

夫片時不打失者名爲真正參玄衲子十二時中冷却面皮。瞠著眼睛毫釐不得放舍。至囑是名動中工夫。有一般學奴初無一念要決了生死大事之心。如等閑相似。三箇五箇聚頭。學得古人話路。唯益多聞。妄情妄識差排。却道這箇是上才。語那箇是就身處。打出語。這箇是事上道。底語那箇是體裏語。吾會佛法了。殊不知無邊衆生各々脚跟下有一則現成公案。靈山四十九年詮註。不出達磨萬里西來指點不破。至若德山臨濟也。摸索不着。汝所透者。乃言說之關耳。佛祖玄關政好。不曾透得。古德道聰明不敵生

死。乾慧豈免苦輪。汝輩纔問着。却是口頭快利。極則相似。纔拶着。七花八裂。坐在空腹高心處。及到臘月三十日。換手。槌骨。已是遲了。凡參學者。先要知法理。否則崑崙吞棗。去是故。古人公案有理觀。有言詮。有向上這裏直須求正悟。莫貴傍通。豈不聞死生之際。一生學問。大關頭也。吾有箇公案。但還真正行脚。衲子兜率悅和尚設三關問學者。一曰撥草參玄。只圖見性。即今上人性在甚處。爲君幾度下蒼龍窟。二曰識得自性。方脫生死。眼光落地時。作麼生脫杓。卜聞虛聲。三曰脫得生死。使知去處。四大分離向甚麼處。

無字妙經
去喝又有箇古話黃龍禪師問隆慶禪師云人々有箇生緣處如何是汝生緣處對曰早晨喫白粥至今又覺飢又問我手何似佛手對曰月下弄琵琶又問我脚何似驢脚對曰鶯鷺立雪非同色師每以此三語問學者莫能契其旨天下叢林目爲三關此話譬如常山蛇打首其尾酬打尾其首酬打中間其首尾酬毒氣漲天臭煙捲地盡大地人不免喪身失命又有一段話頭雪峯與巖頭欽山同行凡三到投子九上洞山置漆桶木杓到處作飯頭自古至今成大業成大德者其皆如此歟一日率巖頭訪欽山至鼇山

店上阻雪巖頭每日只是打睡雪峯一向坐禪江湖雖無礙人之心有時人過不得佛祖雖無瞞人之意有時人透不得巖頭喝曰瞋眠去每日床上恰似七村裏土地相似他時後日魔魅人家男女去在大小叢老以已方人雪峯自點胷云某甲這裏未穩在不敢自瞞大疑之下有大悟巖頭曰我將謂爾已後向孤峯頂上盤結草庵播揚大教猶作這箇語話雪峯云某甲實未穩在款出囚人口巖頭曰汝若實如此據爾見處一一通來是處我爲汝證明不是處爲汝剗却兄呼弟應成何事拽出心肝剖出腸雪峯遂舉

見鹽官上堂聞舉色空義得箇入處巖頭曰此去三十年後切忌舉着冬瓜印子胡亂證入雪峯云因洞山過水悟道頌切忌隨他去迢々與我疎我今獨自往觸處得逢渠渠今正是我我今不是渠應須恁麼會方得契如如我於此得箇省處巖頭曰若恁麼自救不了針人痛處不是好心雪峯云我又因問德山從上宗乘中事學人還有分也無德山打一棒云道什麼我當下如桶底脫相似脚力盡時山更好白雲散處路猶長巖頭遂喝曰豈不見道從門入者不是家珍爲人須爲徹殺人須見血雪峯云他後如何即

是巖頭曰他日若欲播揚大教須是一一從自己胸襟流出將來蓋天蓋地去抓著吾痒處未是十分雪峯於言下大悟便禮拜起來連聲叫云師兄師兄今日始是鼇山成道今日始是鼇山成道行盡迢々路今朝始到家古人一等結伴行脚就中鼇山店上之緣最奇特危險如入虎豹之窟艱難似臨蛟龍之淵寔是萬古叢林參禪底榜樣畢竟以什麼作憑據同心之事其利斷金同心之言其臭如蘭更有箇古因緣善財童子於覺城東際古佛廟前將謂西偏却是東際見文殊菩薩獅子嘯呻處一念證阿耨多羅三

藐三菩提，再於妙峯山頂，德雲比丘別峯相見，處脫體現成，獲得憶念一切諸佛境界，智慧光明普見法門，徒是漸次南行，將謂北遊，却是南詢，過一百一十城，參五十三員善知識，末後到毘盧遮那莊嚴大樓閣前，聞彌勒彈指之聲，樓閣門開入已，還閉，將謂無門無戶，却是有閉有開，於樓閣中見無量無邊不可思議自在境界，然後彌勒菩薩又禪指一聲，善財從三昧起，復依彌勒教，希欲奉勸文殊，於是文殊遙伸右手，過一百一十由旬，按善財頂，曰：善哉善哉，善男子，若離信根，心劣憂悔，功行不具，退失精勤，於一善

根心生住著，於少功德便以為足，不能善巧發起行願，不為善知識之所攝護，乃至不能了知如是法性如是理趣，如是法門如是所行如是境界，若周偏知若種々知若盡源底，若解了若趣入若解說若分別若證知若獲得皆悉，不能文殊如是宣示善財善財於言下成就阿僧祇法門，具足無量大智光明，遂入普賢色身三昧，於一念中悉見三千大千世界微塵數諸善知識，悉皆親近恭敬承事受行，其教得不忘念智莊嚴藏解脫，以至入普賢毛孔刹於一毛孔行一步過，不可說不可說，佛刹微塵數世界與普賢等。

諸佛等刹等行等及解脫自在悉皆同等無二無別直饒恁麼會得更參三十年此是華嚴經中佛廣大說法輪今爲汝畧說雖不及百分千分百千分百千萬億分乃至算數譬喻不可說不可說阿僧祇分之一又以足窺其涯際學者欲透破萬重玄關鎖入祖師堂奧請依箇修行樣式佛豈賺人哉大慧和尚常謂他曰我大悟十八度小悟不知其數古人尙如是今人豈不然哉見性之力微弱時不能轉業障差別之智不明了不能利衆生是故不可不知次第修行要路古人曰涅槃心易曉差別智難明謹言真正參

玄上士更須就上增修不得棄嫌因果常如是工夫如是鍛煉久々自撞發關棧子矣

頌曰

機關萬疊爲君開 不用踟躕踏斷來
全體更無迴避處 篙枝如雨喝如雷

言詮微妙品第四
無字經童子曰佛祖難解言句之謂言詮學者既獲得法身透破機關了更無文字可立又無言句可出無迷無悟恁麼地坐在畢竟違背佛法之真古人謂之解脫深坑所以菩薩不住如上所得境界闢開箇大陀羅尼門以無師智發無作妙用以無緣慈作不請勝友向一句下有殺有活於一機中有縱有擒千轉萬轉直是明眼衲僧覷不破此故當知言句大有仔細雲門大師道沒量大人被語脉裏轉却汝若直下透得徹解得徹一切惡毒語言文字乃至世間一

言詮微妙品第四

無字經童子曰佛祖難解言句之謂言詮學者既獲得法身透破機關了更無文字可立又無言句可出無迷無悟恁麼地坐在畢竟違背佛法之真古人謂之解脫深坑所以菩薩不住如上所得境界闢開箇大陀羅尼門以無師智發無作妙用以無緣慈作不請勝友向一句下有殺有活於一機中有縱有擒千轉萬轉直是明眼衲僧覷不破此故當知言句大有仔細雲門大師道沒量大人被語脉裏轉却汝若直下透得徹解得徹一切惡毒語言文字乃至世間一

切戲論皆變成醍醐上味。古人錄中或有序跋記銘書牘論說辯碑祭文等諸體。或有頌古題贊小佛事感興懷別貽贈等種類。其他有普說代別下語評唱垂示秉炬等品目。悉是異乎陽春白雪碧雲清風。又殊乎韓柳歐蘇太白少陵者也。古德曰：吾宗無語句無一法與人。以無語句故。語句愈妙幽谷無私遂至斯響。以一法故。萬法益玄。洪鐘簾受扣無不應。如斯宗通說通離四句絕百非。橫說豎說。函蓋乾坤。截斷衆流。直下坐斷天下人舌頭。了楞伽曰：通宗不通說。闇中如開眼。通說不通宗。白日如合眼。宗說共通。

白日如開眼。如是名大善知識。又古德云：吾宗所重者。惟在宗通說通。有向上爪牙爲人。解粘去縛。謂傳法度生。餘皆末事也。大凡言論須有轉身之謀。商量豈無截流之機。夫一身解脫。通宗則足。若不通說。何以度衆生。是知究盡言句。底學者爲成利他願也。攝大乘論曰：從眞如流出正體智。正體智流出後得智。後得智流出大悲心。大悲心流出十二部經。不見乎世尊成道後。於三七日中。思惟如是事。我盡一切漏。本願成滿。我所得法甚深難解。不可以言宣。唯佛與佛乃能知之。一切衆生於五濁世爲貪瞋痴之所覆。

障薄福鈍根無有智慧云何能解所得法今我若爲轉法輪者彼必迷惑不信受而生誹謗當墮惡道受諸苦我寧不說法疾入於涅槃爾時大梵天王見之心懷憂惱即自念言世尊於無量億劫備受諸苦今始所願滿足成阿耨多羅三藐三菩提云何默然不說法衆生長夜沉沒生死我今當往請轉法輪即至如來處頭面禮足請轉妙法輪釋提桓因乃至他化自在天亦復如是勸請爾時世尊自思惟八正聖道是三世諸佛之所履行趣般涅槃路我今已踐智慧通達無所罣礙于時大地十八相動遊霞飛塵皆悉

澄淨天鼓自然而發妙聲香風起降甘露雨雨種々天華是時作天妓樂燒香歌唄讚歎執天寶蓋及幢旛充塞虛空供養如來爾時世尊受梵王請於摩竭提國阿蘭若菩提場中爲大菩薩說大方廣佛華嚴經是根本法輪一代藏經共所歸止惟諸大菩薩聞佛說法其餘小乘如聾如啞是以佛往詣波羅奈國鹿野苑中觀根逗教應機而說初轉四諦法輪次說十二因緣六波羅密法是道三乘只爲法門偏枯志行下劣又說方等彈呵之教破此窠窟以二乘類比疥癩野干意要三藏學者回心向大歸根本乘是故

有別教大乘二乘聞失其志菩薩進究其旨維摩經
曰一切聲聞聞是不可思議解脫法門皆應號泣聲
震三千大千世界一切菩薩應大欣慶頂受此法譬
如師子哮吼師子兒聞皆增勇健一切禽獸遠避竄
伏後來重說般若法門二乘三藏上下混雜淘汰空
法所謂引小空而歸大空呵偏空而入圓空破假空
而達真空如是多年時到功熟忽示圓頓實相法門
三乘五性齊打入一佛乘了猶有餘機未盡故說涅
槃一經而拈拾之末後臨入涅槃之時文殊白云請
世尊再轉末后法輪世尊咄曰吾自鹿死而至於跋

提河於是二中間未曾說一字汝請吾再轉法輪是
曾轉法輪耶世尊恁麼道不妨個中又是一重關鎖
又於涅槃會上以手摩胸告衆曰汝等善觀吾紫磨
金色之身瞻仰取足勿令後悔若謂吾滅度非吾弟
子若謂吾不滅度亦非吾弟子時百萬億衆皆契悟
童子詣拘尸城有偈曰日落沙羅雙樹前波旬拍手
笑哈然正音不起二千歲誰把鸞膠續斷絃又不見
達磨大師遙觀此土有大乘根器遂泛海得々來單
傳心印開示迷塗所謂不立文字教外別傳直指人
心見性成佛今時學者往々誤認此語見佛經祖錄

宛如冤讎，然或以言教爲枝葉，一齊放擲，或於言教強恣情臆，說種々道理，殊不知教外分明，教內何妨？教外若不容教，教外亦非真。汝爲所見，不分明，却謗如來金言，不能究經中難解玄旨，不是以經論爲宗。且以經論爲明鏡，耳教中道，言說文字皆解脫，相所以者何？解脫者不內不外，不在兩間。文字亦不內不外，不在兩間。是故無離文字說解脫也。又古人曰：晝明窓下，古教照心；夜僧堂裏，坐禪辨道。是即以教照自性，以自性照教，內外一片，彼此通徹。譬如兩鏡相照，中心無影像，但文字言句解脫之根本繫縛之根。

本也非其人，非其時，醍醐變作毒藥，所謂得之於心。伊蘭作旃檀之樹，失之於旨，甘露乃蒺藜之園。正眼看來，五時八教，三乘一乘，齊是祖師向上。一著子無汝下嘴處，無汝措足處。凡參學者，須參活句，莫念死句。活句下薦取，永劫不忘；死句下薦取，自救不了。是故古人大有葛藤相，爲處佛光國師寓小朶峯時，虛堂愚居鷲峯庵，師常往來講明終日，堂嘗有送僧偈相送，當門有修竹爲君，葉々起清風之句，以示師。師曰：和尚此偈，只是閑言語，中間無些子禪堂拈起頌子。曰者，個聾師擬對堂劈面一揮，自是得句語三昧。

後來國師一代獅子吼果然爲本朝開山錄中王又
長沙和尚一日遊山歸至門首首座問和尚何處去
來沙云遊山來首座云到什麼處來沙云始隨芳草
去又逐落花回座云大似春意沙云也勝秋露滴芙
蕖雪竇着語云謝答話此話極黃絹幼婦亦是外孫
壻白雖然如是唯同道者知又巴陵和尚三轉語云
如何是提婆宗曰銀碗裏盛雪如何是吹毛劍曰珊
瑚枝々撐着月如何是道曰明眼人落井雲門云他
日老僧忌辰祇舉此三轉語報恩足矣寔是叢林可
貴古實又雲門大師到江州有陳尙書者請齋纔見

便問儒書中即不問三乘十二分教自有座主作麼
生是衲僧行脚事師曰曾問幾人來書曰即今問上
座師曰即今且置作麼生是教意書曰黃卷赤軸師
曰這箇是文字語言作麼生是教意書曰口欲談而
辭喪心欲緣而慮亡師曰口欲談而辭喪爲對有言
心欲緣而慮亡爲對妄想作麼生是教意書無語師
曰見道尙書看法華經是否書曰是師曰經中道治
生產業皆與實相不相違背且道非々想天有幾人
退位書又無語師曰尙書且莫草々師僧家拋却三
經五論來入叢林十年二十年尙自不奈何尙書又

爭得會書禮拜曰某甲罪過這箇話諸方悉道借婆
帔拜婆年騎賊馬趕賊隊殊不知珠走盤不撥自轉
矢離絃無返回勢還有緇素得出底麼龍蛇易辨衲
子難瞞大慧和尚曰今時兄弟只作戲論殊不知法
無戲論只貴天真自然道得一句盤山有言譬如擲
劍揮空莫論及之不及至者裏教中所謂普賢菩薩
從佛華莊嚴三昧起普惠菩薩雲興二百問普賢菩
薩餅瀉二千酬未爲分外事不見乎文殊云前三三
後三三六祖云葉落歸根來時無口長慶云寧說阿
羅漢有三毒不說如來有二種語百丈云將謂胡鬚

赤更有赤鬚胡瞎堂見或菴讚圓通像之語驚起曰
不謂此菴有此兒投子聞大隋隨他去之語炷香禮
拜云西蜀有古佛出世祥菴主聞洞山曉聰禪師君
子愛財之語大驚云雲門兒孫猶在中夜燒香望雲
居拜之圓悟聞高菴果然現大人相之語乃歎曰龍
門有此子東山道未寂寥止菴頌南泉上山作務因
緣云珊瑚枕上兩行淚半是思君半恨君大慧聞得
令侍者收牌曰只者一轉語足報佛恩矣又聞密庵
破沙盆之語大稱賞三日高臥不起曰法道有人吾
可安枕矣有僧問雪峯臨濟有四喝意旨如何雪峯

曰我初發足便往河北不意中途大師化去因不及見之他家宗旨我所未知汝尋彼兒孫問之僧以問南院且言雪峯嘗遣之之意南院望雪峯再拜曰真善知識凡古人示一言半句如生鐵橛如木札羹如滴油箭如塗毒鼓如鳩鳥尾如野狐涎如象王鼻如獅子乳如靠天赤土流星劍如徹泉黑火無底坑若是作家底聊聞舉着別起便行但恐汝透因緣不得在遂連舉一絡索誦訛公案若又如雪竇明覺大師絕世宗眼具翰林才碧巖百則頌出衲僧向上巴鼻希叟曇贊曰高風逸韻古來今只許一人如北斗秦

山宗師爲人須至如此據曲录木床上坐大凡佛祖機緣隱奧難見先德發越希聲爲物作則譬如琴瑟笙篴雖有妙音若無妙指終不能發古人言雲門以言句救臨濟以機鋒救其實不然機中有句句中有機若向這裏識得此二人一出一入處千箇萬箇只是一箇作主也恁麼作賓也恁麼二人畢竟合成一家要看麼春風如刀春雨如膏學者要極言句之妙三條椽下七尺單前須是扣已而參直要真實不得信口掠虛縱使汝解語如塵沙說法如湧泉若落識量差排不免鄉關萬里古人曰不疑言句是作大病

須是脚跟下五色線子斷自然一切差別語言繫絆他不得勉之乎勉之乎趙州口唇皮子上放大光明東山左邊底發暗號令或有用翳睛法又有弄黑豆法須信凡百言句皆有親疎之分畢竟作麼生祇許老胡知不許老胡會

頌曰

言詮意路果如何

麤細淺深具揣摩

若是金毛獅子子

三千里外見誦訛

難透正眼品第五

無字經童子曰烹佛烹祖恢張作家活爐鑪鍛凡鍛聖漫下本色惡鉗鎚之謂難透若是箇鶻眼龍睛底漢纔聞舉着如象王渡水徹底截流而過又如獅子遊行自在不求伴侶更不周由者也若是皮膚之士一似蚊蟲弄空裏猛風螻蟻撼於鐵柱相似有甚交涉雲門大師曰平地上死人無數出得荆棘林者是好手何謂荆棘林古人難透話頭是也學者縱令打破漆桶透過重關究盡許多言詮了爭奈祖庭猶隔天涯脚下更有毒霧喪魂之大洋頭上却有鳥飛不

渡之嶮灘自是非不顧危亡之上士焉能有透脫之分乎謂之浩波洪渺白浪滔天之雜毒海出曜經曰智者以慧鍊心猶如鑛鐵數入百煉則成精金猶如大海晝夜沸動則成大寶是故學者欲到真正安樂田地轉悟轉舉轉了轉參果見祖師最后因緣如見掌上若不然無禪長者裸形窮子非啻不能利他自救亦不了且與他拽出這參天爛葛藤去却有透得底麼舉撫州疎山仁禪師因主事僧爲師造壽塔來白師師曰汝將幾錢與匠人僧云一切在和尙師云爲將三文與匠人好爲將兩文與匠人好爲將一文

與匠人好若道得與吾親造壽塔其僧茫然羅山時在太廩嶺住菴後有僧到太嶺舉似前話嶺云還有人道得麼僧云未有人道得嶺云爾歸舉似疎山道人道得三文與匠人和尙此生決定不得塔若將兩文與匠人和尙與匠人共出一隻手若將一文與匠人帶累匠人眉鬚墮落僧回舉似疎山師具威儀遙望太嶺禮拜讚歎云將謂無人太廩嶺有古佛放光射至此間雖然也是臘月裡蓮花太嶺聞得云我與麼道早是龜毛長數尺虛堂曰二大老向針頭上削鐵擬鑄太阿煞佛煞祖爭奈未有人橫點頭徑山壽塔

是崑山薦嚴嗣子寶葉造來亦不知其價直且道與太嶺古佛放光射至此間相去多少卓主丈多年曆日如能用免被巡官指上推有旨哉有旨哉祇要汝親參實證又舉五祖演禪師曰譬如水牯牛過窓櫺頭角四蹄都過了因甚尾巴過不得無門曰若向者裏顛倒著得一隻眼下得一轉語可以上報四恩下資三有其或未然更須照顧尾巴始得更作頌云過去墮抗漚回來却被壞者些尾巴子直是奇怪有旨哉有旨哉祇要汝親參實證又舉長沙岑禪師因三聖令秀首座問云南泉遷化向甚麼處去師云石頭

爲沙彌時曾見六祖秀云不問爲沙彌時南泉遷化向甚麼處去師云教伊尋思去秀云和尚雖有千尺寒松且無抽條石筍師默然秀云謝和尚答話師亦默然秀回舉似三聖聖云若實與麼勝臨濟七步雖然如是待我明日更看過至明日乃問承聞和尚昨日答南泉遷化一則話可謂光前絕後今古罕聞師亦默然有旨哉有旨哉祇要汝親參實證又舉臺山路上有一婆子凡有僧問臺山路向甚麼處去婆云慕直去僧纔行三五步婆云好箇師僧又與麼去後有僧舉似趙州州云待我去爲汝勘過這婆子明日

便去亦如是問婆亦如是答州歸謂衆云臺山婆子被我勘破了大應國師頌云發動煙塵箇老婆趙州一語定干戈從茲四海清如鏡贏得將軍奏凱歌有旨哉有旨哉祇要汝親參實證又舉乾峯和尚上堂曰法身有三種病二種光須是一一透過始解穩坐地雲門出衆云菴內人爲甚麼不知菴外事峰呵々大笑門云猶是學人疑處峰云子是什麼心行門云也要和尚委悉峰云直須恁麼穩密始解穩坐地門云喏々大應國師拈云韶陽老人也是隨邪逐惡當時只是冷笑一聲管取乾峯隱身無路有旨哉有旨

哉祇要汝親參實證又舉陸亘大夫與南泉語話次亘云肇法師道天地與我同根万物與我一體也甚奇怪南泉指庭前花召大夫云時人見此一株花如夢相似雪竇大師頌曰聞見覺知非一一山河不在鏡中觀霜天月落夜將半誰共澄潭照影寒古人是爲百則頌中之髓有旨哉有旨哉祇要汝親參實證其他黃檗唾酒糟之因緣鹽官犀牛扇子之話陳操登樓之緣婆子燒庵之則善財參勝熱波羅門因緣等皆是難信難解難透難入底一著子是謂法窟爪牙又名奪命神符吾今鳴素彌捷槌告諸丈夫兒欲

見處通徹用處明白當旋機電卷結角羅紋槃錯縱
橫自能回轉得無凝滯去把此等話頭朝打三千暮
打八百直賭性命參莫似無慚愧僧或有一類漢一
向說心說性談理談事絲來線去綿々密々以爲得
不知早已墮細膩又有一類漢只管行棒行喝爲怒
爲罵電轉星飛磊々落落以爲了不知早已陷龜
大凡激揚要妙提唱宗乘向第一機下明得可以坐
斷天下人舌頭儻或擬議躊躇落二落三爭奈鼻孔
在別人手裡古德云此一件大事須是一箇入山撞
見大蟲驀腰捉住勢作兩截有如此氣概底人方可

擔荷五須彌山障礙備不得百億刹土障礙備不得
四大海水障礙備不得雖然與麼爐鞴之所鈍鐵多
良醫之門病者足

頌曰

難透話頭難解緣

作家禪客別天然

紅爐鞴上鉗鎚密

百煉精金色轉鮮

向上涅槃品第六

無字經童子曰佛祖頂顛一著之謂向上盤山和尚曰向上一路千聖不傳學者勞形如猿捉影或又是謂末后句浮山和尚曰末后一句始到牢關指南之旨不在言詮實是吾宗最后向上出身一路也古人道若向上轉去直得釋迦彌勒文殊普賢千聖萬賢天下宗師普皆飲氣吞聲若向下轉去醯雞蠅蠹蠢動含靈一一放大光明壁立萬仞儻或不上不下又作麼生到這裏道箇佛字拖泥帶水道箇禪字滿面慚惶圓悟禪師曰者中忽有個出來道本來無向上

向下用參作什麼只向伊道我也知爾向鬼窟裡作活計惜乎間有一等聰明之輩作道理會云本無悟處作箇悟門建立此事若恁麼見解如獅子身中蟲自食獅子肉不見古人道源不深者流不長智不大者見不遠若用作建立會佛法豈到今日哉千佛萬祖出世爲人只圖知有箇向上事百丈禪師再參馬祖不唧溜漢侍立次祖以目視繩床角頭拂子兩箇一場敗闕祖見來拈拂子豎起丈云即此用離此用情知泥裏洗土塊祖掛拂子於舊處祖云汝向後開兩片皮將何爲人也要知爾落處丈取拂子豎起蝦

跳不出斗祖云即此用離此用驗人端的處下口即知音丈掛拂子於舊處果然只在舊窠窟裡祖振威一喝輪王髻中珠不可輕分付丈直得三日耳聾雖然如是若不酬價爭辨真僞後來謂黃檗云佛法不是小事我當時被馬祖一喝直得三日耳聾黃檗不覺悚然吐舌雪竇拈云奇怪諸禪德如今列其派者甚多究其源者極少總道百丈於喝下大悟還端的也無然刁刀相似魚魯參差若是明眼漢瞞他一點不得只如馬祖道備他後開兩片皮將何爲人百丈豎起拂子爲復如蟲禦木爲復啐啄同時諸人要會

三日耳聾麼大冶精金應無變色圓悟頌曰豎拂掛拂全機出沒即此離此講若畫一頂門直下轟霹靂針出膏盲必死疾承當一喝聾三日師子神威恣反擲百鍊精金須失色復云有麼有麼咄又臨濟和尚半夏上黃檗胡蜂不戀舊時窠見和尚看經濟云我將謂是箇人元來是搯黑豆老和尚錯證羊了也住數日乃辭去檗曰汝破夏來又不終夏去靈木迢然鳳不依倚濟云某甲暫來禮拜和尚仁義道中不無爾檗遂打趁令去若不是這般大爐鞴如何烹煉得大根機人濟行數里疑此事却回終夏鹽落醬裡一

日辭黃檗々問什麼處去濟云不是河南便歸河北檗便打濟約住與一掌檗大笑乃喚侍者將百丈先師禪板几案來濟云侍者將火來檗云雖然如是汝但將去已後坐却天下人舌頭去在後瀉山問仰山臨濟莫辜負他黃檗也無仰山云不然瀉山云子又作麼生仰山云知恩方解報恩瀉山云從上古人還有相似底也無仰山云有祇是年代深遠不欲舉似和尚瀉山云雖然如是吾亦要知子但舉看仰山云祇如楞嚴會上阿難讚佛云將此深心奉塵刹是則名爲報佛恩豈不是報恩之事瀉山云如是如是見

與師齊減師半德見過於師方堪傳授一句驚群須是英靈漢全鋒敵聖還他獅子兒選佛若無如是眼假饒千載又奚爲童子打一偈曰江西一喝轟宗門河北全機破血盆有櫛柄兮無鎖鑰雙懸日月照乾坤更有數段因緣爲汝舉德山一日齋遲托鉢下堂見雪峯問者老漢鐘未鳴鼓未響托鉢向甚處去山無語低頭歸方丈峰舉似岩頭頭曰大小德山未會末后句山聞令侍者喚岩頭來問云汝不肯老僧那頭密啓其意山乃休去明日陞座果與尋常不同頭至僧堂前拊手大笑曰且喜老漢會末后句他後天

下人不奈伊何雖然如是也只得三年活果三年化去又雪峯住菴時有兩僧來禮拜峯見來以手托庵門放身出云是什麼僧亦云是什麼峯低頭歸菴僧後到岩頭頭問什麼處來僧云嶺南來頭云曾到雪峯麼僧云曾到頭云有何言句僧舉前話頭云他道什麼僧云他無語低頭歸菴頭云噫我當初悔不向他道末后句若向伊道末后句天下人不奈雪老何僧至夏末再舉前話請益頭云何不早問僧云未敢容易頭云雪峯雖與我同條生不與我同條死要識末后句只這是鵝林大士曰靈山大弟子大阿羅漢

未能解此義底大事佛々機要祖々要機滴々傳持
岩頭提起名爲末后句只傳得些子來寔可貴矣有
深旨哉又白雲一日到磨院語五祖曰備還知一件
事麼祖曰不知曰近日有數人禪客自廬山來問他
皆有悟入處教伊說禪亦說得下語亦下得批判古
今亦判得祖曰和尚如何雲曰我向彼道直是未
在祖於此大疑後七日方諭厥旨走見白雲雲爲手舞
足踏祖亦一笑而已祖常以此話謂學者曰吾因茲
出得一身白汗自是明得下載清風又小參曰某甲
十有餘年海上參尋初參遷和尚得其毛次於四海

參見諸尊宿得其皮又到浮山圓鑑老處得其骨後
到白雲門下敲破一箇鐵酸賺直得百味具足且道
賺子一句子作麼生道乃曰華發雞冠媚早秋誰人
能染紫絲頭有時風動頻相倚似向堦前鬪不休松
源云五祖恁麼說法猶欠悟在有深旨哉又如達磨
大師命門人曰時將至矣汝等蓋各言所得乎時有
道副對曰如我所見不執文字不離文字而爲道用
祖曰汝得吾皮尼總持曰我今所解如慶喜見阿闍
佛國一見更不再見祖曰汝得吾肉道育曰四大本
空五陰非有而吾見處無一法可得祖曰汝得吾骨

最後惠可禮三拜後依位而立祖曰汝得吾髓於是付法傳衣有深旨哉又如浩布棍一日爲張無盡舉傅大士頌曰空手把鋤頭步行騎水牛人從橋上過橋流水不流又舉洞山頌曰五臺山頂雲蒸飯佛殿堦前狗尿天刹竿頭上煎餛飩子三箇胡獠夜簸錢此二頌只頌得法身邊事不頌得法身向上事張曰請和尚頌浩曰昨夜雨霽烹打倒蒲萄棚知事普請行者人力拄底拄撐底撐々々拄々到天明依舊可憐生有深旨哉疎山和尚曰病僧咸通年以前識得法身邊事咸通年以後識得法身向上事古人爲人不

妨孤峻向虎口裏橫身放得手脚千里萬里隨汝銜去何故還他得這一著子始得洞山辨向上人眞僞有三種滲漏臨濟定善知識好惡有一箇膠盆子這般穿鑿切須仔細莫莽鹵諸人還了得麼若了得直下荷擔將去直下受用將去若了不得依然不免供他欸大凡宗師家欲舉揚箇事須是具逆行順行天不能測底大手腳始得花園國師垂語曰我這裏無生死柏樹子話有賊機此是一味弄向上底又被風吹別調中雲門大師曰山河大地無絲毫過患猶是轉句直得不見一色始是半提更須知有向上全提

時節又曰直得觸目無滯達得名身句身一切法空
山河大地是名名亦不可得喚作三昧性海俱備猶
是無風巾々之波直得忘知於覺々即佛性矣喚作
無事人更須知有向上一竅在虛堂拈云雲門大師
今日入爾諸人鬪體裏橫三豎四見爾不覺不知乃
云土曠人稀相逢者少是等因緣是爲周羅一結末
爲些子

頌曰

向上玄關敲破難
那邊一著太無端
吾宗別有生涯在
未后因緣仔細看

大佛頂首楞嚴三昧照魔鏡

附刊

古教照心者宗門之大範也箇事成熟後必須先入
首楞嚴健相分別正定倒用魔王印直驅大小一切
魔侶不然恐蹉過者多焉予乃作箇照魔鏡

第一精明溢流前境魔

四大不織 須臾之中 身能出礙 猶行虛空

第二精明流溢形體魔

五內瑩徹 忽出螻蚋 依然身相 亦無毀乖

第三精魄遞相離合魔

魂魄涉入 爲主爲賓 忽於空裏 聞轉法輪

第四心魂靈悟所染心光研明照諸世
界魔

盧遮那佛 踞天光臺 百億國土 蓮花放開

第五抑按功力逾分魔

七寶百寶 徧滿虛空 青黃赤白 各々玲瓏

第六心細密澄其見所視洞幽魔

忽於夜合 見種々光 暗室之內 不殊太陽

第七塵併排四大性魔

體同艸木 刀火無知 縱割其肉 猶如削枝

第八欣狀凝想日深想久化成魔

恒沙諸佛 徧滿虛空 下見地獄 上觀天宮

第九迫心逼極飛出故多隔見魔

忽於中夜 遙見遠方 街巷親族 笑語一場

第十邪心含受魑魅或遭天魔入其心

腹無端說法通達妙義魔

見善知識 形態變移 少選之內 爲魅爲魑

右十鏡屬色蘊區字以堅固妄想爲本

第十一悲魔

得大光耀 發無窮悲 觀見蚊蚋 猶如赤兒

第十二狂魔

振無限勇 心如鬼神 上不見佛 下不見人

第十三憶魔

入中墮地 迥無所看 生大枯渴 沈憶不安

第十四下劣知足魔

得少為足 更不進前 心懷勝性 疑是金仙

第十五常憂愁魔

手執刀劍 自割其身 或入幽谷 不耐見人

又

埋海憂腦 堆山愁腸 如飲毒藥 似坐鐵牀

第十六好喜樂魔

手舞足蹈 目笑口歌 長安路上 哩々囉々

第十七大我慢魔

經是樹葉 像是金銅 廣謂檀越 何足尊崇

第十八好輕清魔

圓悟精理 頓獲輕安 更不進修 獨自顛預

第十九空魔

撥無因果 不起信心 飲酒噉肉 廣行邪媠

第二十欲魔

只以貪欲 為大菩提 起神鬼力 廣攝愚迷

無字如經
右十鏡屬受蓋區字以虛明妄想爲本

第二十一怪鬼年老成魔

或寢暗室 身有光明 好言禍福 又談刀兵

第二十二魅鬼年老成魔

紫金光聚 坐寶蓮華 破菩提種 滅正法芽

第二十三魅鬼年老成魔

或得宿命 或有他心 說人好惡 談世昇沈

第二十四蠱毒魘勝惡鬼年老成魔

具威神力 摧伏人天 好指男女 爲菩提緣

第二十五厲鬼年老成魔

如膠如漆 愛著倍生 或言他界 別有光明

第二十六大力鬼年老成魔

敷坐說法 言語甚微 未然禍福 毫髮無違

第二十七山林土地城隍川嶽鬼神年

老成魔

於說法處 得大寶珠 他方世界 珍奇自殊

第二十八天地大力山精海精風精河

精土精一切草木積功精魅或復龍魅

或壽終仙再活爲魅或仙期終計年應

死其形不化他怪所附年老成魔

手執火光 手撮其光 四衆頭上 各分火光

又

或行水上 或坐空中 或入餅內 或處囊中

第二十九日月薄蝕精氣金玉芝草麟

鳳龜鶴經千萬年不死爲靈出生國土

年老成魔

吐梅檀氣 現琉璃身 無因無果 一死永泯

第三十住世自在天魔

我是元佛 修得無因 能與長命 又現女身

右十鏡屬想蘊區字以融通妄想爲本

第三十一外道立無因論魔

本無因故 只得眼根 末無因故 全失脚跟

第三十二外道立圓常論魔

窮心境性 生滅爲常 盡心意識 不生滅常

第三十三外道一分常論魔

見壞不壞 計常無常 如微塵轉 唯行爲常

第三十四外道立有邊論魔

三世衆生 有際無邊 心性生滅 無際有邊

第三十五外道四顛倒性不死矯亂徧
計虛論魔

八示如麻 唯無如戈 只是如盾 俱見如柯
第三十六外道立五陰中死後有相心
顛倒論魔

死後有相 顛倒發心 循環二八 現形現音
第三十七外道立五陰中死後無相心
顛倒論魔

死後無相 顛倒發心 循環二四 滅形滅音
第三十八外道立五陰中死後俱非心

顛倒論魔

虛實失措 有無俱非 生前身後 不覺不知
第三十九外道立五陰中死後斷滅心
顛倒論魔

人天界滅 初二三滅 四禪亦銷 無色界滅
第四十外道立五陰中五現涅槃心顛
倒論魔

迷執有漏 偏計無爲 四禪欲界 爲勝淨依
右十鏡屬行蘊區宇以幽隱妄想爲本

第四十一立所得心成所歸果違遠圓
通背涅槃城生外道種魔

因所因執 墮眞常窠 所歸冥諦 婆毘迦羅

第四十二立能爲心成能事果違遠圓

通背涅槃城生大慢天我徧圓種魔

能非能執 墮自體窠 無邊身現 摩醯首羅

第四十三立因依心成妄計果違遠圓

通背涅槃城生倒圓種魔

常非常執 墮他體窠 無生無滅 自在首羅

第四十四計圓知心成虛謬果違遠圓

通背涅槃城生倒知種魔

知無知執 墮遍圓窠 人木無擇 霰尼私吒

第四十五計著崇事迷心從物立妄求

因求妄冀果違遠圓通背涅槃城生顛

化種魔

生無生執 墮常住窠 事火崇水 諸迦葉波

第四十六圓虛無心成空亡果違遠圓

通背涅槃城生斷滅種魔

歸無歸執 墮永滅窠 無想天外 諸舜若多

第四十七執着命元立固妄因趣長勞

果違遠圓通背涅槃城生妄延種魔

貪非貪執 墮精圓窠 只求長命 諸阿斯陀

第四十八發邪思因立熾塵果遠違圓

通背涅槃城生天魔種魔

眞非眞執 墮互通窠 盛起塵事 吒枳迦羅

第四十九圓精應心成趣寂果違遠圓

通背涅槃城生纏空種魔

聲聞定性 墮精眞窠 起增上慢 無聞僧伽

第五十圓覺溜心成湛明果違遠圓通

背涅槃城生覺圓明不化圓種魔

辟支定性 墮深妙窠 無悲化用 緣貝獨螺

右十鏡屬織蘊區字以顛倒妄想爲本

上來既辨五十種魔境了更有一分魔入汝心腑却

辨得出麼咄見其眸子人焉度哉觀其脚跟人焉竄

哉 无字經禪窟主 花押

終